



Novjorka Prismo

Numero 142

Marto 2005

La Esperanto-Societo de Novjorko kore invitas vin al sia marto kunveno

DATO: Vendredon, la 18-an de marto 2005, 6:30-9:00 ptm

LOKO: United Federation of Teachers
50 Broadway, Second Floor, Room A
(between Bowling Green and Exchange Place), NYC

PROGRAMO: 6:30 – Babilado kaj refreŝigaĵoj.

7:00 – Thomas Eccardt prelegos pri:
La stranga historio de la Esperanto-movado en Novjorko. ★

Protokolo de la kunveno de la 18-a de februaro 2005

Precize je la sepa horo, Stuart GREEN oficiale malfermis la kunvenon kaj bonvenigis ĉiujn. Stuart memorigis nin pri pago de la societa kotizo por la jaro 2005. Li diris, ke kiu ankoraŭ ne pagis, tiu povas sendi al Sonja SOSKINA sian kotizon kune kun la verda slipo enkovertigita kun ĉiu *Prismo*.

Ĉeestis 18 personoj ĉe la kunveno, inkluzive nian preleganton.

La protokolo de la januara kunveno estis akceptata. Sekvis kelkaj anoncoj. Unue, Rochelle F. GROSSMAN montris artikolon, kiu aperis la 8-an de februaro en *New York Times*. La titolo de la artikolo estis "At a Bustling City Clinic, Esperanto Would Come in Handy" (Esperante: "En urba kliniko plena de agado, Esperanto estus oportuna"). La artikolo estis verkita de kuracisto Danielle OFRI kaj priskribis la malfacilecon de komunikiĝo kun unu el siaj pacientoj, kiu ne scipovas la anglan. Malgraŭ la titolo, la teksto de la artikolo ne menciis nian lingvon. Tamen Rochelle esprimis la esperon, ke ĝi pensigos la publikon pri Esperanto kaj pri la lingva

problemo en mult-lingvaj situacioj.

Due, Tomaso ECCARDT, subredaktoro de nia bulteno *Novjorka Prismo*, petis pardonon pro la malfruco de ĝia dissendo en februaro. Li diris, ke li kaj Jim MEDRANO klopodos pretigi ĝin pli glate en venontaj monatoj.

Tomaso anoncis poste, ke lia nova kurso de Esperanto baldaŭ komenciĝos post la fino de la nuna kurso. Interesatoj estis invititaj kontakti lin pri ĝi.

Maki SANO diris, ke ŝi serĉas prelegantojn. Ŝi petis, ke iu, kiu volas prelegi pri io ĉe venonta kunveno, kontaktu ŝin pri tio.

Fine, Sonja SOSKINA anoncis, ke ŝi povas provizi informon al interesatoj pri la Baltaj Esperantaj Tagoj, kiuj okazos la venontan someron en Riga, Latvio, ĉirkau la tempo de la UK en Vilnius, Litovio.

Post la anoncoj, dum paŭzo antaŭ la alveno de nia preleganto, la grupo aŭskultis plurajn amuzajn anekdotojn legitajn kaj rakontitajn de Tomaso, Sonja, kaj Stuart.

Je la 7:50-a horo alvenis nia preleganto

Susan POLGAR. S-ino Polgar estas la plej alte rangita ŝakistino en la mondo, kaj la unua grandmajstrino en la historio de ŝako. Ŝi fondis kaj estras la Polgar Chess Center (Polgar-a Ŝakocentro, www.polgarchess.com) en Forest Hills, Queens.



S-ino Polgar kreskis inter esperantistoj kaj estis aktiva kun sia familio en la E-movado dum sia juneco en Hungario.

Ŝi prelegis al ni angle, sed respondis senhezite kiam ni faris demandojn Esperante. Ŝi parolis pri sia vivo kaj sia kariero en ŝako, pri la fondo de sia Ŝakocentro, pri la agado de ĝi, kaj pri siaj celoj por ĝi.

Post la prelego s-ino Polgar afable faris aŭtografojn por kelkaj el ni kaj sidis por pluraj fotoj kun nia grupo.

Fine, je la naŭa horo precize, Stuarto formale fermis la kunvenon. ★

Protokolis: Jeff BLAKESLEE



Societanoj de ESNY kun nia gasto Susan Polgar (meze) dum la februara kunveno.

La stranga historio de la Esperanto-movado en Novjorko

En kiu jaro okazis du usonaj landaj jarkongresoj en la novjorka regiono, la dua malpli ol du semajnoj post la unua? Kial? (Helpeto: en tiu tempo ekzistis ankaŭ du Esperanto-Societoj de Novjorko). Kiu estas tiu Zamenof en la foto, kaj kiel li kontribuis al la Esperanto-movado en Novjorko?



Por la respondoj al la superaj, bonvolu ĉeesti la venontan ESNY klub-kunvenon, kie mi klarigas la respondojn al tiuj kaj aliaj interesaj demandoj. ★

– Tom ECCARDT

Forpasis Johano Bachrich

30-aprilo-1921 – 28-februaro-2005

Johano Bachrich estis motoro de la Esperanto-movado en Venezuelo. Kun la ĉarma edzino Maria li faris multajn ekskursojn antaŭ aŭ post Universalaj Kongresoj per la vojaĝservo de Lusi Harmon, do, ili konatiĝis kaj amikiĝis kun multaj usonaj kaj kanadaj geesperantistoj. Mi aparte rememoras, ke tiuj ekskursemuloj daŭrigis longan vojaĝon tra duono de Aŭstralio per private aranĝita, plua tutsemajna aŭtobusvojaĝo tra Okcidenta Aŭstralio. Ili pasis kelkajn tagojn en Novjorko, kaj ni ESNY-anoj kune manĝis en iu barata aŭ afgana restoracio en la Supra Orienta Flanko de la urbo.

En la jaro 2000, dum la UK en Tel-Avivo, li estis nomumita Honora Membro de UEA pro siaj multaj servoj al nia movado.



Johano Bachrich
(fotis James Resende
Piton dum TAKE 2001)

Dum la lastaj jaroj ili forlasis Venezuelon pro malkonsento kun la tiea registaro. Johano naskiĝis en Vieno kaj Maria en Hungario. Lia forpaso estas granda persona perdo por multaj geesperantistoj tra la mondo. ★

– Arnold VICTOR

Kultura Esperanto-Festivalo (KEF 2005)

Saluton!

Ĉu jam vi aŭdis, ke okazos en Helsinko, Finnlando, Kultura Esperanto-Festivalo (KEF) 16-23.7.2005? La festivalo KEF koncentriĝas al originale Esperanta kulturo kaj estas konata pro tre altkvalita kultura programo: Roko, popo, opero, trobadoroj, poemoj, filmoj, romanoj, noveloj, teatraĵoj, karaokeo, diskoteko.

Ĝi estas celita por ĉiuaĝaj, kulturemaj partoprenantoj. Dum KEF eblos ne nur vidi prezentojn literaturajn, muzikajn kaj teatrajn, sed partopreni mem. Ekz. verki poemojn en poemateliere, konatiĝi kun prozostiloj, kun filmodublado, kun popmuziko, esperantaj ampoemoj aŭ krimromanoj . . . kaj multe pli. Kaj evidente, vi ne povas eviti konatiĝon kun nia finna kulturo ankaŭ: Kalevala, kanteleo (praa kordoinstrumento), ŝamanoj kaj naturo.

Ĉi-kune iomaj programaj informoj. Pli ekzaktaj informoj aperos tre baldaŭ en www.esperanto.fi/kef2005. Memoru, cetere, ke Finnlando ne estas tre for de Litovio

aŭ Pollando, se vi jam veturos al UK/IJK.

Ni estus tre, tre dankemaj, se vi povus disvastigi ĉi tiun informon pri la finna KEF al viaj membroj rete kaj revue. Anticipan dankegon! ★

Amike salutas,
Riitta Hamalainen
KEF-teamo
<www.esperanto.fi/kef2005>

KEF 2005
Muziko
Literaturo
Teatro
Aliaj
Kiel aliĝi?

IBM Plaza

La unuan dimanĉon post la solena fermo de "La Pordegoj" en Novjorko, pli malpli dek ESNY-anoj renkontiĝis ĉe IBM Plaza por babilo. Ili diskutis plurajn gravajn aferojn, inkluzive makartismon, komunismon, ŝakludon kaj strigojn. Ankaŭ, Pilar Rau malavare disdonis ekzemplerojn de sia DVD de nia lasta Zamenhofa festo. Je la tria horo, oni aŭskultis la ludadon de la "uberorgan," artaĵo starigita en la plazo, kaj foriris. ★

– Tom ECCARDT



Societa Kalendaro

Venu al niaj venontaj renkontiĝoj!
Metu tiujn datojn en vian kalendaron.

Marto 2005

18

ESNY KUNVENO

La stranga historio de la Esperanto-movado en Novjorko
Prelego de Thomas Eccardt
Vendredon, 6:30 ptm ĉe UFT

Aprilo

3

Tagmanĝo

Dimanĉon, 1:00 ptm ĉe IBM Plaza
(Limdato por kontribuajoj por *Prismo* 143)

ESNY KUNVENO

15

Vendredon, 6:30 ptm ĉe UFT

United Federation of Teachers (UFT)
50 Broadway, Second Floor, Room A
(between Bowling Green and Exchange Place)
"IBM" Building Atrium (antaŭa nomo)
590 Madison Avenue (56th Street) NYC
Street level, in the Atrium

ARE 12 – Silvero

Okemo-semajnfino ne retenas sian malnovan nomon pro ĝia translokiĝo al Lake George en Nov-Jorkstato. La Aŭtuna Renkontiĝo de Esperanto (ARE) fariĝas Silvero ĉar ĝi okazos en Silver Bay apud Lago Georgo.

La gastejo tie havas limigitan nombron da ĉambroj kaj ĉiuj estos okupataj je la Kolumbofesta semajnfino, do, endas mendi tiel frue kiel eble. Se vi atendas post aŭgusto vi verŝajne ne havos lokon. Kontakti rekte la gastejon por mendi privatan ĉambron ĉe The Inn: www.silverbay.org/reservations/accommodations.html.

Normand Fleury de Montrealo estas la aranĝanto por tiuj, kiuj volas grupe loĝi en dometoj (cottages). Mendu frue ĝis junio: informo@esperanto.qc.ca.

Poŝta adreso estas:

ESK-ARE / 6358-A, rue de Bordeaux
Montréal, Québec / Canada, H2G 2R8

Kompletaj informoj pri ARE troviĝas en interreto je: www.esperanto.qc.ca aŭ rekte esperanto.cam.org/are-eo-h.htm.

Bonvenon al Esperantio en Silvero! ★

Société québécoise d'espéranto
Esperanto-Societo Kebekia
12^a ARE

– Arnold VICTOR/
Normand FLEURY

ESPERANTO-SOCIETO DE NOVJORKO

c/o UEA, 777 UN Plaza, NY, NY 10017 (212) 687-7041
http://www.geocities.com/esperanto_nyc

Prezidanto
Stuart Green
(631) 751-5683

Korespondanta Sekretariino
Rochelle F. Grossman
(718) 457-1490

Protokolisto
Jeff Blakeslee
(718) 383-2715

Vicprezidanto
Thomas Eccardt
(212) 477-6516

Kasistino
Sofiya Soskina
(914) 738-6084

Program-Direktorino
Maki Sano
(212) 614-9184

Redaktoro
Jim Medrano
(212) 982-5029

Subredaktoroj
Thomas Eccardt
Nancee Medrano

Desegnistino
Mary Pulley

Sendu kontribuojn al:
Jim Medrano, 400 East 20th Street #1B, New York, NY 10009-8103
e-poŝto: medrano@mac.com

© 2005 Esperanto Society of New York